

Na osnovu člana 16. stav 1. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10) i člana 23. Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 1/14), na prijedlog Ministarstva za boračka pitanja, Vlada Zeničko-dobojskog kantona, na 172. sjednici održanoj dana 10.07.2014.godine, d o n o s i

UREDBU

O STIPENDIRANJU REDOVNOG STUDIJA BRANILACA I ČLANOVA NJIHOVIH PORODICA

DIO PRVI - OPĆE ODREDBE

Član 1.

(Predmet Uredbe)

Ovom Uredbom utvrđuju se uvjeti, način i postupak ostvarivanja prava na dodjelu stipendija studentima - braniocima i članovima njihovih porodica, koji su srednje obrazovanje stekli u školama na području Bosne i Hercegovine, za redovni studij na visokoškolskim ustanovama.

Član 2.

(Redovni studij)

Redovni studij na visokoškolskim ustanovama u smislu ove Uredbe obuhvata redovni i samofinansirajući studij prvog i drugog ciklusa Bolonjskog sistema studiranja.

Član 3.

(Korisnici prava)

Pravo na dodjelu dodjelu stipendije po ovoj Uredbi mogu ostvariti:

- a) dobitnici ratnih priznanja ili odlikovanja;
- b) ratni vojni invalidi;
- c) demobilizirani branioци koji su u periodu od 06.04.1992. do 23.12.1995.godine u sastavu Oružanih snaga proveli najmanje 24 mjeseca odnosno 12 mjeseci, ukoliko su u OS pristupili kao maloljetno lice ili neposredno po punoljetstvu;
- d) članovi porodice šehida, poginulih, umrlih i nestalih branilaca i umrlih ratnih vojnih invalida;
- e) članovi uže porodice poginulih, umrlih ili nestalih dobitnika ratnog priznanja ili odlikovanja;
- f) djeca dobitnika ratnih priznanja ili odlikovanja - do navršene 30. godine života;
- g) djeca ratnih vojnih invalida - do navršene 30. godine života;
- h) djeca demobiliziranih branilaca koji su u periodu od 06.04.1992. do 23.12.1995.godine u sastavu Oružanih snaga proveli najmanje 24 mjeseca odnosno 12 mjeseci, ukoliko su u OS pristupili kao maloljetno lice ili neposredno po punoljetstvu - do navršene 30. godine života.

Član 4.

(Posebni korisnici)

Prava po ovoj Uredbi može koristiti i:

- a) dijete šehida, poginulog, umrlog, nestalog branioca, kojem je prestalo pravo na porodičnu invalidninu - do navršene 35. godine života;

- b) dijete poginulog, umrlog ili nestalog dobitnika ratnog priznanja ili odlikovanja, osim lica iz tačke a) ovog člana, kojem je prestalo pravo na mjesečni novčani dodatak i dijete umrlog ratnog vojnog invalida koje nije korisnik prava na porodičnu invalidninu - do navršene 30. godine života;
- c) dijete umrlog demobiliziranog branioca koji je u redovima Oružanih snaga proveo najmanje dvije godine i koje je sa istim živjelo u zajedničkom domaćinstvu ili ga je isti izdržavao najmanje posljednju godinu dana prije smrti - do navršene 30. godine života.

Član 5.

(Pojmovi i definicije)

- (1) Pojmovi korišteni u Uredbi: dobitnik ratnog priznanja ili odlikovanja, ratni vojni invalid, demobilizirani branilac, učesnik rata, član porodice šehida, poginulog, umrlog, nestalog branioca i umrlog ratnog vojnog invalida i član uže porodice poginulog, umrlog ili nestalog dobitnika ratnog priznanja ili odlikovanja, upotrijebljeni su u skladu sa odredbama Zakona o pravima branilaca i članova njihovih porodica ("Službene novine Federacije Bosne i Hercegovine" broj 33/04, 56/05, 70/07 i 9/10) i Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH" broj 70/05, 61/06 i 9/10).
- (2) Djetetom dobitnika ratnog priznanja ili odlikovanja/ratnog vojnog invalida/demobiliziranog branioca, u smislu ove Uredbe, smatra se dijete rođeno u braku/van braka, usvojeno dijete, kao i pastorko koje je sa istim živjelo u zajedničkom domaćinstvu najmanje posljednju godinu dana.

Član 6.

(Dokazivanje statusa)

U postupku ostvarivanja prava po ovoj Uredbi, branioci i članovi njihovih porodica svoj status dokazuju rješenjem nadležnog organa o priznavanju prava na ličnu i porodičnu invalidninu za ratnog vojnog invalida odnosno člana porodice šehida, poginulog, umrlog, nestalog branioca ili umrlog ratnog vojnog invalida; o priznavanju prava na mjesečni novčani dodatak za dobitnike ratnih priznanja i odlikovanja i članove uže porodice poginulog, umrlog ili nestalog dobitnika ratnog priznanja ili odlikovanja; uvjerenjem nadležnog organa o periodu učešća u Oružanim snagama za demobiliziranog branioca, te na osnovu smrtnog lista i uvjerenja o učešću u Oružanim snagama umrlog demobiliziranog branioca, izdatog u skladu sa Zakonom o upravnom postupku ("Službene novine FBiH" broj 2/98 i 48/99).

Član 7.

(Visina stipendije)

- (1) Visina stipendije određuje se u sljedećim iznosima:
 - a) za prvu godinu I ciklusa studija 800 KM;
 - b) za drugu i ostale godine studija 1200 KM.
- (2) Isplata stipendija se vrši u osam jednakih mjesečnih rata koje iznose:
 - a) za prvu godinu I ciklusa studija 100 KM;
 - b) za drugu i ostale godine studija 150 KM.

DIO DRUGI - NAČIN OSTVARIVANJA PRAVA

POGLAVLJE I. UVJETI ZA DODJELU STIPENDIJE

Član 8.

(Uvjeti)

- (1) Pravo na dodjelu stipendije, lica iz člana 3. i 4. ove Uredbe mogu ostvariti pod uvjetom da:

- a) imaju prebivalište na području Kantona u trajanju od najmanje dvije godine neprekidno, osim povratnika u Republiku Srpsku;
 - b) prava iz oblasti branilačko-invalidske zaštite ostvaruju u općinama Kantona;
 - c) oni i članovi njihovog porodičnog domaćinstva nisu vlasnici ili suvlasnici subjekta koji obavlja privrednu ili drugu djelatnost, registriranog kao pravno ili fizičko lice;
 - d) prihod po članu domaćinstva istih ne prelazi iznos od 80% prosječne neto plaće isplaćene u Kantonu u prethodnoj godini;
- (2) Odredba stava (1) tačka d) ovog člana ne odnosi se na kandidate iz člana 3. tačka d) i e) ove Uredbe.

Član 9.

(Posebni uvjet)

Lica iz člana 3. tačke d), e), f), g) i h) i člana 4. ove Uredbe, pravo na dodjelu stipendije mogu ostvariti za studij na visokoškolskoj ustanovi koji su upisali do navršene 25. godine života.

Član 10.

(Izuzće)

Pravo na dodjelu stipendije po ovoj Uredbi ne mogu ostvariti studenti koji:

- a) imaju status apsolvanta;
- b) u tekućoj studijskoj godini na istom ili drugom fakultetu ponovno upisuju istu godinu studija;
- c) su na vanrednom studiju;
- d) primaju kredit ili stipendiju drugog davaoca.

POGLAVLJE II. POSTUPAK DODJELE STIPENDIJE

Odjeljak A. Konkurs

Član 11.

(Raspisivanje konkursa)

- (1) Stipendije se dodjeljuju kandidatima izabranim po osnovu rezultata konkursa, kojeg za svaku studijsku godinu raspisuje Ministarstvo za boračka pitanja Zeničko-dobojskog kantona (u daljnjem tekstu: Ministarstvo).
- (2) Objavljivanje konkursa se vrši u jednom od dnevnih listova koji se distribuiraju na cijelom teritoriju Bosne i Hercegovine, nakon čega tekst konkursa Ministarstvo objavljuje na web stranici Kantona i dostavlja kantonalnim udruženjima branilaca i članova njihovih porodica.
- (3) Po dostavljenoj obavijesti Ministarstva u tom smislu, općinska služba isticanjem na oglasnoj ploči, putem web stranice općine i lokalnih sredstava informisanja obavještava zainteresovane kandidate o objavljenom konkursu za dodjelu stipendija i mogućnosti podnošenja prijave na isti.

Član 12.

(Sadržina konkursa)

Konkurs za dodjelu stipendija sadrži podatke o:

- a) ukupnom iznosu sredstava namijenjenom stipendiranju;
- b) visini stipendija i broju mjesečnih rata u kojima se vrši isplata;
- c) licima koja imaju pravo učešća na konkursu;
- d) kandidatima čije prijave neće biti uzete u razmatranje;
- e) kriterijima na osnovu kojih se vrši izbor kandidata;

- f) dokazima koje kandidati prilažu uz prijavu na konkurs;
- g) roku za prijavu na konkurs i organu kojem se ista podnosi.

Odjeljak B. Prijava na konkurs

Član 13.

(Podnošenje zahtjeva)

- (1) Prijavu na konkurs sa potrebnom dokumentacijom kandidat podnosi općinskoj službi nadležnoj za poslove branilačko-invalidske zaštite u općini u kojoj ima prebivalište, odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: općinska služba).
- (2) Prijavu iz stava (1) ovog člana kandidat podnosi u vidu zahtjeva za dodjelu stipendije, na posebnom obrascu kojeg propisuje ministar Ministarstva u roku od osam dana od dana stupanja na snagu ove Uredbe.

Član 14.

(Obavezna dokumentacija)

Uz prijavu na konkurs kandidat prilaže sljedeću dokumentaciju:

- a) ovjerenu fotokopiju lične karte;
- b) dokaz o statusu branioca i člana njegove porodice;
- c) uvjerenje o prebivalištu;
- d) potvrdu o redovnom studiju;
- e) dokaz o ostvarenom uspjehu u prethodno završenoj školskoj/studijskoj godini (ovjerena kopija svjedočanstva/uvjerenje o ostvarenom prosjeku ocjena u predhodnoj studijskoj godini);
- f) ovjerenu kućnu listu;
- g) uvjerenje ili drugi dokaz o prosječnom prihodu za posljednja tri mjeseca, za svakog punoljetnog člana domaćinstva sa kućne liste;
- h) izjavu da ne prima stipendiju po drugom osnovu.

POGLAVLJE III. KRITERIJI ZA IZBOR KANDIDATA

Član 15.

(Bodovanje)

Izbor kandidata za dodjelu stipendije vrši se na osnovu bodova ostvarenih primjenom kriterija utvrđenih ovom Uredbom.

Član 16.

(Izbor kandidata bez bodovanja)

- (1) Izuzetno od odredbe člana 15. ove Uredbe, pravo na dodjelu stipendije bez bodovanja imaju:
 - a) kandidati iz člana 3. tačka a) do tačke e) i člana 4. ove Uredbe;
 - b) djeca ratnih vojnih invalida sa procentom invaliditeta 70% i više;
 - c) kandidati sa procentom invaliditeta 70% i više.

Član 17.

(Ograničenje u dodjeli stipendija)

- (2) Stipendija može biti dodijeljena samo jednom kandidatu iz jednog porodičnog domaćinstva.

- (3) Odredba stava (1) ovog člana ne odnosi se na kandidate - djecu šehida, poginulih, umrlih i nestalih branilaca; poginulih, umrlih ili nestalih dobitnika ratnog priznanja ili odlikovanja; umrlih ratnih vojnih invalida i umrlih demobiliziranih branilaca.

Član 18.
(Kriteriji)

- (1) Bodovanje kandidata za dodjelu stipendije vrši se primjenom sljedećih kriterija:
- a) ostvaren uspjeh u prethodno završenoj školskoj/studijskoj godini;
 - b) socijalno-ekonomska situacija;
 - c) ratna priznanja, ratni staž i invaliditet.
- (2) Kriterij iz stava (1) tačka c) ovog člana, odnosi se na roditelja po osnovu čijeg učešća u Oružanim snagama kandidat ostvaruje pravo učešća na konkursu.

Član 19.
(Uspjeh u školovanju)

Po osnovu ostvarenog uspjeha (prosjeaka ocjena) u prethodnoj školskoj/studijskoj godini, kandidat ostvaruje bodove:

- a) za studente prve godine:
 - 1) izvrstan (prosjeak ocjena 5) 7 bodova
 - 2) odličan (prosjeak ocjena iznad 4.5) 5 bodova
 - 3) vrlo dobar (prosjeak ocjena od 3.5 – 4.5) 3 boda
 - 4) dobar (prosjeak ocjena od 2.5 – 3.4) 1 bod.
- b) za studente druge i ostalih godina:
 - 1) izvrstan (prosjeak ocjena 5 odnosno iznad 9.5) 10 bodova
 - 2) odličan (prosjeak ocjena od 4.5 odnosno od 8.5 - 9.5) 7 bodova
 - 3) vrlo dobar (prosjeak ocjena od 3.5 – 4.4 odnosno od 7.5 - 8.4) 5 bodova
 - 4) dobar (prosjeak ocjena od 2.5 – 3.4 odnosno od 6.5 - 7.4) 2 boda.

Član 20.
(Socijalno-ekonomska situacija)

- (1) Po osnovu socijalno-ekonomske situacije, kandidatu pripadaju bodovi:
- a) po članu porodičnog domaćinstva 1 bod
 - b) po članu porodičnog domaćinstva sa invaliditetom, utvrđenog rješenjem nadležne institucije 2 boda
 - c) po osnovu dva i više redovna studenata - za dodjelu stipendije iz jednog domaćinstva 10 bodova
 - d) za svakog narednog člana porodičnog domaćinstva - redovnog studenta 10 bodova
 - e) po osnovu prihoda po članu domaćinstva:
 - 1) do 50 KM 20 bodova
 - 2) od 51 – 100 KM 15 bodova
 - 3) od 101 – 150 KM 10 bodova
 - 4) od 151 – 200 KM 5 bodova
 - 5) od 201 – 300 KM 2 boda.
- (2) Ukupan prihod čine prihodi koje članovi domaćinstva ostvaruju po osnovu: plaća iz radnog odnosa; starosne, invalidske i porodične penzije; druge djelatnosti i dopuskog rada.

- (3) Prihodom se ne smatra: novčana naknada po osnovu invaliditeta za tjelesno oštećenje; novčana naknada za nezaposlene; novčana naknada za pomoć i njegu drugog lica; dodatak na djecu, stipendije i krediti učenika i studenata.
- (4) Dokazi o prihodima u smislu ove Uredbe su: uvjerenje pravnog lica o plaći zaposlenika, penzijski ček, izjava kandidata o prihodima svih članova sa kućne liste.

Član 21.

(Ratna priznanja, ratni staž i stepen invaliditeta roditelja)

- (1) Kandidatu čiji je roditelj dobitnik ratnog priznanja ili odlikovanja pripadaju slijedeći bodovi:
 - a) ratno priznanje Red hrvatskog pletera 2 boda
 - b) ratna priznanja ili odlikovanja Srebrena policijska zvijezda i Srebreni štit 10 bodova
 - c) značka Zlatni ljiljan, Red hrvatskog trolista, i ostala ratna priznanja ili odlikovanja 20 bodova.
- (2) Za svaki puni mjesec ratnog staža jednog roditelja, kandidatu pripada po jedan bod a za drugog roditelja pola boda.
- (3) Kandidatima - djeci ratnih vojnih invalida, pripadaju bodovi po osnovu stepena invaliditeta roditelja:
 - a) VI grupa 10 bodova
 - b) VII grupa 8 bodova
 - c) VIII grupa 6 bodova
 - d) IX grupa 4 boda
 - e) X grupa 2 boda.

POGLAVLJE IV. DONOŠENJE ODLUKE

Član 22.

(Preliminarna lista)

- (1) Općinska služba u postupku po zahtjevu:
 - a) pribavlja podatke o dodijeljenim stipendijama drugih davalaca, a u cilju eliminisanja iz postupka kandidata koji već ostvaruju stipendiju za studij po drugom osnovu;
 - b) vrši bodovanje prijavljenih kandidata koji ispunjavaju uvjete za dodjelu stipendije i sačinjava preliminarnu listu prvenstva.
- (2) Preliminarnu listu općinska služba ističe na oglasnoj ploči i web stranici općine, te dostavlja općinskim udruženjima branilaca i članova njihovih porodica.
- (3) Rješenje o odbacivanju neurednih zahtjeva, odnosno odbijanju zahtjeva kandidata koji ne ispunjavaju uvjete za dodjelu stipendije općinska služba donosi u skraćenom postupku na osnovu člana 139. stav 1. i 2. Zakona o upravnom postupku ("Službene novine Federacije Bosne i Hercegovine" broj 2/98 i 48/99).

Član 23.

(Zahtjev za preispitivanje liste)

- (1) Nezadovoljni kandidati imaju pravo podnošenja zahtjeva za preispitivanje Preliminarne liste, koji mora bit obrazložen i utemeljen na dokazima koji potvrđuju tačnost iznesenih navoda.
- (2) Zahtjev iz stava (1) ovog člana podnosi se općinskoj službi najkasnije u roku od osam dana od dana isticanja liste.

- (3) Općinska služba je obavezna podnosioca zahtjeva pismeno obavijestiti o stavu po podnesenom zahtjevu.

Član 24.

(Konačna lista)

- (1) Nakon razmatranja podnesenih zahtjeva, općinska služba sačinjava konačnu listu prvenstva kandidata za dodjelu stipendija, pri čemu je broj studenata kojima će stipendija biti dodijeljena u zavisnosti od visine utvrđenih budžetskih sredstava opredijeljenih za tu općinu.
- (2) Iznos opredijeljenih budžetskih sredstava po općinama određuje se na osnovu procentualnog učešća pripadnika branilačke populacije u odnosu na njihov ukupan broj u Kantonu.
- (3) Općinska služba ističe konačnu listu na oglasnoj ploči.

Član 25.

(Izdavanje rješenja)

- (1) Na osnovu konačne liste i obavijesti Ministarstva, općinska služba donosi rješenja o dodjeli stipendija izabranim kandidatima, u skladu sa članom 211. Zakona o upravnom postupku.
- (2) Kandidatima koji nisu ostvarili dovoljan broj bodova za dodjelu stipendije u skladu sa konačnom listom općinska služba izdaje rješenja o odbijanju zahtjeva u skraćenom postupku na osnovu člana 139. stav 1. i 2. Zakona o upravnom postupku.
- (3) O žalbi na rješenje općinske službe rješava Ministarstvo.

Član 26.

(Isplata stipendija)

- (1) Isplata stipendija se vrši putem općinskih službi, po dostavljenoj odluci ministra Ministarstva o broju stipendija i iznosu doznačenih sredstava za svaku općinu.
- (2) O doznačenim sredstvima za isplatu stipendija općinska služba obavještava korisnike putem medija i istim vrši isplatu putem tekućih računa.

DIO TREĆI - ZAVRŠNE ODREDBE

Član 27.

(Sredstva za ostvarivanje prava)

Sredstva za stipendiranje studenata – branilaca i članova njihovih porodica, osiguravaju se u Budžetu Kantona, u visini od najmanje 10% ukupnih budžetskih sredstava Ministarstva za boračka pitanja, a u skladu sa prilivom sredstava.

Član 28.

(Pravdanje sredstava)

Općinska služba je dužna Ministarstvu dostaviti pravdanje isplaćenih sredstava stipendija u roku od 15 dana po izvršenoj isplati.

Član 29.

(Evidencija)

Elektronsku evidenciju o podnesenim zahtjevima i korisnicima prava po ovoj Uredbi vode općinske službe i Ministarstvo, po posebnim obrascima koje propisuje ministar Ministarstva u roku od osam dana od dana stupanja Uredbe na snagu.

Član 30.
(Instrukcije i nadzor)

- (1) U realizaciji ove Uredbe, ministar Ministarstva može donijeti odgovarajuće instrukcije.
- (2) Nadzor nad provođenjem Uredbe ima Ministarstvo.

Član 31.
(Ravnopravnost spolova)

Sve imenice koje se odnose na branioce i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 32.
(Stavljanje Uredbe van snage)

Danom stupanja na snagu ove Uredbe prestaje važiti Uredba o stipendiranju branilaca i članova njihovih porodica ("Službene novine Zeničko-dobojskog kantona" broj 2/09 i 5/13).

Član 33.
(Ranije započeti postupci)

Svi slučajevi odnosno postupci koji do dana stupanja na snagu ove Uredbe nisu pravosnažno okončani, završit će se po odredbama propisa koji je bio na snazi u vrijeme podnošenja zahtjeva.

Član 34.
(Stupanje na snagu i objavljivanje Uredbe)

Uredba stupa na snagu danom donošenja, a ista će biti objavljena u "Službenim novinama Zeničko-dobojskog kantona".

Broj: 02-_____/14.
Datum, 10.07.2014. godine
Zenica

PREMIJER

Munib Husejnagić, dipl.ing.maš.

DOSTAVLJENO:
1x Ministarstvo za boračka pitanja,
1x Ministarstvo finansija,
1x Službene novine Zeničko-dobojskog kantona,
1x a/a.